

**1413-VI-5, Barcelona.— Carta del rey de Aragon al Concejo de Murcia para que Pedro García de Villagómez no se entrometa en las relaciones de buena voluntad que Murcia tiene con Orihuela. (A.M.M. Cart. Real 1411-1429, fol. 12r.)**

Nos el rey de Aragon e Seçilla enbiamos mucho saludar a vos, el conçejo, cavalleros, escuderos, e ofiçiales, e omes buenos de la muy noble çibdat de Murçia como aquellos que amamos e preçiamos.

Fazemos vos saber que resçebimos la carta que nos enbiastes e a lo que nos enbiastes dezir en razon de las prendas que el alcalde de las sacas por Pero Garçia de Villagomez fiziera a los vezinos de Orihuela, nuestros vasallos e de la costunbre e buena vezindat que syenpre ha avydo entre esa dicha çibdat e los de la dicha villa en pazer de buelta con vuestros ganados en los terminos de la dicha çibdat e villa e los de la dicha villa coger e sacar grana del termino de la dicha çibdat, que vosotros queriendo guardar la dicha costunbre e buena vezindat que tomara al dicho alcalde las dichas prendas e las dieredes a los dichos vezinos de Orihuela, e que nos pediades por merçed que vos mandasemos guardar la dicha costunbre e buena vezindat que syenpre ha seydo entre esa dicha çibdat e la dicha villa de Orihuela, a lo qual vos respondemos, que a nos plazia que vos sea guardada la dicha costunbre e buena vezindat segund que fazia que vos fue guardada, sobre lo qual nos enbiamos mandar al dicho alcalde delas sacas por el dicho Pero Garçia de Villagomez que se non entremeta por la dicha razon de prender a los vezinos de la dicha villa de Orihuela, nuestros vasallos, e que vos guarde la dicha buena costunbre de vezindat que sienpre fue entre esa dicha çibdat e la villa de Orihuela, pues fazia agora vos ha seydo por los otros alcalles que fueron de las sacas del regno de Murçia.

Porque vos rogamos que vos tractedes e ayades buena vezindat con los dichos nuestros vasallos segund que fasta agora la avedes avido, en lo qual nos faredes plazer e serviçio.

Dada en la çibdat de Barçelona, de yuso de nuestro sello secreto, a çinco dias de Junio, del año de la Nativitat de nuestro Señor de mill e quatroçientos e treze años. Yo Alfonso Gonçalez de Guadalfajara la escrivi por mandado de mi señor el rey de Aragon. Rex Ferrandus.

